

26. august 2014

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiuppara:

**Nukissiorfiit 1. januar 2016 A/S-inngortinneqarnissaanik UPA15-imi Naalackersuisut inatsisissatut siunnersuummik saqqummiusseqqullugit peqquneqarnissaanik Inatsisartut aalajangiiffigisassaattut siunnersuut.**

(Inatsisartunut ilaasortaq Kristian Jeremiassen, Siumut)

**Tunngavilersuut:**

Nukissiorfiit piginneqatigiilluni ingerlatsivinngortinneqarnera isorliunerusunut nunaqarfinnullu akitigut allanngortitsinaviangilaq, Nunatta Karsianiit ingerlanneqarneranut aningaassaliissutit annertussusaannut aamma allanngortitsinaviangilaq. Taakkumi akit piginneqatigiilluni ingerlatsivinngortinneqaraluarpalluunniit politikikkut aalajangigassatut inissinneqartuaannassapput.

Taammattorli Nukissiorfiit aktieselskabengortinneqarnera pisortat aningaasaqarnerannut siunniuteqassaaq, tassami ukiuni tulluuttuni pingasuni sisamaniluunniit pisortat 3- aamma 400 mio. kr.-nit akornanni aningaasaateqarnerulissammata, sanaartugassanummi atugassanik Nukissiorfiit aningaasanik Nunatta Karsia avaaqqullugu atorniartalissammata.

Nukissiorfiit aktieselskabinngortinneqarnissaanut pilersaarusiornermut najoqqutassiami kingullermi ullumikkornit suliamut tulluarsagaanerusumik Nukissiorfiit ingerlanneqarlernissaat innersuussutigineqarpoq. Pilersaarusiornermut najoqqutassiami tassani aamma kommuneqarfiit Nukissiorfimmik piginneqataalernissaat innersuussutaavoq, kommuneqarfiit Nukissiorfiullu akornanni ataqatigiissarinerup pitsaanerpaamik ingerlanneqarnissaa siunertaralugu.

Ilutigalugu naapertuuppoq Nukissiorfiit ingerlaavartumik aningaasaliinissanut pilersaarusiortarnerat eqqarsaatigilluagaasumik pilersuinernullu ataatsimut isigalugu pisassappat, pilersaarusiortarneq piviusunngortitsisarnelu sanaartornernik ukiuni 40-nit 50-inut siumut isigaluni politikikkut ukiumiit ukiumut Nunatta Karsiata Aningaasanut Inatsisaata aningaasatigut inissisimasarneranut qilersorsimannigitsuusariaqarpoq.

Nukissiorfiit ulluinnarni illoqarfinni 17-ini nunaqarfinnilu 53-ini innallagissamik, imermik kiassarnermillu tunisassiorlutillu tunisaqartarput.

Akit annerpaaffissat minnerpaaffissaallu naalackersuisunikkut aalajangerneqartarnerat pissutigalugu, Nukissiorfiit tunisassiornermut tuniniaanermullu akitigitataat naalackersuinikkut naapertuuttumik aalajangersarneqartarput.

Nukissiorfiit aktiaatileqatigiiffinngortinnginneratigut sinaakkutit taamaaginnartinneqarnerat, innaallagissap, erngup kiassarnerullu sapinngisamik akikinnerpaamiitinnissaanut naalackersuinikkut anguniakkanut naapertuutissaaq. Nukissiorfiilli

aktiaatileqatigiiffingortinneratigut sinaakkutinik allannguinnikkut, Nukissiorfiit ungasinnerusumut pilersaarusiornissamik periarfissaqalissapput, taamaalillunilu ukiuni aalajangersimasuni aningaasaliissutigineqartussat naalakkersuinikkut aalajangerneqartarunnaassallutik.

Taamaaliorneq eqaallisaataassaaq, sanaartornissamut pilersaarutit siuartinneqartarnerat kinguartinneqartarnerallu suliamut tunngasumik piviusorsiortumillu tunngaveqarluni aalajangerneqartalissalluni.

Piffissamilu aalajangersimasumi pisariaqartitsineq aallaavigalugu aki appasinnerpaaffissaminiittoq atorlugu kiffartuussinermut sinaakkusiineq ingerlanneqassalluni. Assersuutissaqqinnerpaavoq Tele Greenland A/S-ip piginneqatigiilluni ingerlatsivinngortinneqarnera taassumalu kinguneranik akiusut ingerlaavartumik appariartortinneqarsimanerat.

Nukissiorfiit aktiaatileqatigiiffingortinneqarneratigut ingerlatseqatigiiffik aningaasaliisarnerni pissutsinut nalinginnaasunut ilanngutissaaq, taamaalillunilu Nunatta Karsianit taarsigassarsinani aningaaserivimmi taarsigassarsisalissaaq. Tamanna Nunatta Karsianut ukiuni pingasunit sisamanut tulluuttuni ISA-mik angusaanut 300-400 mio. kr.-illu akornanni angusarissaarnerulerneranik kinguneqassaaq.

Taamaattoq tassunga atatillugu erseqqissassavara piginneqatigiiffingortitsineq suliffeqarfimmut akiitsoqalersitsinermik siunertaqassanngimmat, Nunatta Karsianiit atukkat aningaaserivinnut nuutiinnarlugit taamaaliornikkullu atukkat annerusumik erniaqalersissinnaanngorlugit, tamannami atuisunut akitsorsaataaginnassamat.

DAU-mi killiffik pitsaanerusoq kiffartuussinikkut pitsanngorsaanissanut aningaasaleeqqinnernut atorneqartussaassaaq Nukissiorfiit susassaqrifiisa iluani kiffartuussinikkut atortulersuutit eqqarsaatigalugit.

Taamaattumik erseqqissaatigilara: Nukissiorfiit aktiaatileqatigiiffingortissanngilarput Aningaasanut Inatsimmi DAU-p killiffia pitsanngorsarniarlugu ingelatsinermilu ingerlaavartumik aningaasartuutit annertusillugit. Taamaaliorneq nunatta aningaasaqarnera eqqarsaatigalugu akisussaassuseqanngitsuliornerussaag.

Suliffeqarfimmik allanngortitsinerup siunertarissavaa nukissiornermi attuumassutilinnik ingerlatsinermi pitsanngorsaanissaq; pisortat aningaasaataannik atuinerulersitsinngutsumik imaluunniit pisortat akiitsuunik annertunerulersitsinngitsumik.

Suliffeqarfiup allanngortinneqarnerani nalilersoqqissaatariaqarpoq aningaasat ullumikkut Nukissiorfinnut sanaartornernut ingerlatsinermullu atukkiunneqartartut aningaasaliissutitut tunniunneqassannginnersut aktiaatileqatigiiffittut aallartinniarneqarneranut atatillugu.

Akisussaassuseqanngitsuliornerussaarmi Nukissiorfiit piginneqatigiiffittut ingerlaleruni sanaartukkat tamatta pigisavut qularnaveeqqutitut atorlugit aningaasanik ingerlatsinissamut atugassaminik atorniassaguni.

Pissutsit uku assigiinngitsut Nukissiorfiit piginneqatigiilluni ingerlatsivinngortinneqarneratigut pitsaanerusumik ingerlanneqarneranut sinaakkusiissapput:

- Naalackersuinikkut ingerlatseqatigiiffeqarnermullu inatsiseqarnikkut akisussaaffiit erseqqissumik avissaartinneqarnerat.
- Siulersuisut aqutsisullu aqutugalugit aalajangiisinnatitaanerup aqutsisutullu akisussaanerup erseqqissumik nassuiarneqarnerat.
- Sanaanut sanaartukkanillu ingerlatanut pilersaarusiernerup piffissaliivigineqarnerata patajaallisarneqarnera.
- Aalajangiiniarnermik suliaqarneq pisariillisarneqassaaq.
- Ingerlatsinermi pitsaanerusumik ingerlasinnaaneq maannakkumiit namminersortitaalluni ingerlatsinermiit.
- Suliffeqarfiup naatsorsuutaanik ullumerniit pitsaanerusumik malittarinnissinnaaneq aktianik piginneqatigiilluni inatsisip peqqussutai malillugit.

Naggataatigut ilassutigissavara politikikkut suliffeqarfiup aqunneqarnera ataannassammat, Naalackersuisut piginneqatigiiffiup ataatsimeersuarneranut siulersuisunik toqqaasussaataitaanerat tunngavigalugu. Naalackersuisut qaqugukkulluunniit Nukissiorfiit akigititai ingerlanneqarneranullu aningaasartuutissatut tapiissutaasinnaasut aalajangiivigisassavaat.

Taamatut tunngavilersuuteqarlunga siunnersuut Inatsisartunut suliassanngortippara.

#### **Siunnersuutip aningaasatigut allaffissornikkullu pisortanut kinguneqaatissai**

Nukissiorfiit A/S-inngotinneqarnissaanik Naalackersuisut siunnersuusiornissaat Namminersorlutik Oqartussanut allaffissornikkut aningaasartuutaanissaa naatsorsuutigineqarpoq. Siunnersuusimissaq AC-tut atorfillip ukiup ataatsip iluani sulineranik naleqassasoq naatsorsuutigineqarpoq, aningaasanngorlugu 500.000 kr.-nik naleqassangatinneqarluni.

Taassuma saniatigut ilimagisariaqarpoq pisortanut akiitsunik akiliisitsiniartarnermut malittarisassat ilaneqartariaqarnissaat Namminersorlutik Oqartussat suliffeqarfiutaat pilersuineramik suliallit sinnerlugit akiliisitsiniartarnissamik periarfissiisumik.

Ilangullugu naatsorsorneqartariaqarpoq erniat Nukissiorfiit Nunatta Karsianut akilertagaasa peerneqarnissaat, A/S Nukissiorfiit namminerisamik aningaasanik atorniassappat immaqaluunniit inatsisit naapertorlugit piginneqatigiissutitut aningaasaliissutit suliffeqarfittut aningaasaqarnikkut aaqqissussaannerminut ilaatillugu pissarsiarigunigit.

Taamaattumik Aningaasanut Inatsimmi annertuumik allannortoqassaaq, Naalackersuisut inatsisissatut siunnersuutissamut inaarutaasumik ilanngussassaannik.

#### **Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai**

Soqanngilaq.

#### **Siunnersuutip innuttaasunut allaffissornikkut aningaasatigullu kinguneqaatissai**

Soqanngilaq.